

All To Car ta Expande cu Showroom y Tres Marca Nobo

All To Car, un pionero den e industria di auto na Aruba, ta orguyoso di anuncia e apertura di otro showroom, trahando luga pa yama bon bini na tres marca nobo di auto: Baic, Dongfeng y Kandi. Nan ta bin pa complementa e excelente oferta di e agencia, cu ya ta inclui marcanan popular manera Changan, BAW, Wuling y Hozon.

E soft opening di e showroom nobo a tuma luga diamars 10 di december 2024, den presencia di gerencia, personal, invitado y prensa. E facilidad nobo ta ubica convenientemente banda di e sede original di tienda y garashi na L.G. Smith Boulevard 114, ampliando asina e espacio di All To Car cu un impresionante 3.000 meter cuadra. Esaki ta trece e total na 17.000 meter cuadra, fortaleciendo nos posicion como lider den e sector di auto riba e isla.

E showroom moderno ta mas cu djis un area pa mostra e vehiculonan; tambe ta inclui un battery lab center pa vehiculonan electrico (EV), hybrid y plug-in hybrid (PHEV). Adicionalmente, e facilidad nobo ta conta cu un garashi pa vehiculo



di gasolin y diesel, mescos cu un departamento di piesa mas grandi y gestock pa cumpli cu e demanda di nos clientela.

All To Car ta sigui ofrece su garantia di 5 aña of 100.000 kilometer, sigurando e confiansa y satisfaccion di nos clientenan. E compania tambe ta enfoca den mantene e nivelnan mas halto di servicio, certificando nos tecniconan den cada un

di e marcanan di auto cu ta representa. Pa marca e ocasion special aki, tres experto di e marcanan nobo tabata presente pa e develop di e showroom y pa entrena e personal local.

Como e prome agencia di auto pa introduci vehiculonan electrico na e isla 12 aña pasa, All To Car a demonstra e viabilidad y bentaha di auto EVs, consolidando su papel como e lider den e mercado local pa loke ta transporte sostenibel. E compania tambe a expande su presencia na Corsou cu un agencia completo y ta exporta pa Boneiro, como e representante oficial di seis di su marcanan pa e islanan ABC.

E expansion mas reciente di All To Car ta resalta su compromiso cu innovacion, sostenibilidad y pa brinda vehiculonan di clase mundial na su clientenan.

Pa mas informacion, bishita All To Car na L.G. Smith Boulevard 114 of yama 290-2600 of email na alltocar@alltogo.la. Sigui All To Car riba media social pa e noticia mas nobo riba promocion y servicio na Facebook.

Conseho Electoral di Aruba a presenta e resultadonan oficial di eleccion parlamentario 2024

Ayer mainta durante un sesion publico en bibo Conseho Electoral di Aruba a presenta e resultadonan oficial di eleccion parlamentario cu a tuma luga dia 6 di december ultimo. Presidente di Conseho Electoral, Sr. Rossi Marchena, a oficialmente confirma e resultadonan preliminar alabes a indica ken ta e candidatonan scogi, pa cada partido, pa drenta Parlamento di Aruba.

Durante e sesion publico Conseho Electoral a confirma pa cada lista di partido politico e total di voto pa cada candidato riba e lista di partido politico, e total di tur e votonan pa cu e candidatonan riba e lista, cu ta ser yama stemcijfer, lo confirma tambe e kiesdeler cual ta e total di voto valido dividi door di 21, total di asientonan den parlamento, cuanto asiento cada partido a saca, e reparticion di e restzetels na e partidonan cu a saca un of mas asiento, tambe kico e lijstkiesdeler pa cada partido politico, esaki ta e stemcijfer, cual ta e total di voto ricibi, dividi door di e total asiento ricibi pa cada partido..

Marchena a indica cu e cantidad di voto total pa cada candidato cu Hoofdstembureau a publica caba ta ser confirma door di Conseho Electoral como e cantidad total cu cada candidato a ricibi.

Manera ta conoci caba, mediante e resultado preliminar, Marchena a confirma e total di voto cu cada partido a ricibi; partido MAS a haya total 1,727 voto; partido PPA a haya total 3,538 voto; partido RAIZ a haya total 2,324 voto; partido HTC a haya total 505 voto; partido CURPA a haya total 423 voto; partido Futuro a haya total 7,351 voto; partido LPR a haya total 1,349 voto; partido RED a haya total 635 voto; partido Accion21 a haya total 2,203 voto; partido MEP a haya total 17,560 voto; y partido AVP a haya total 17,872 voto.

Esaki ta nifica cu e total di votonan valido tabata 55,496 y e total aki dividi door di 21, e cantidad di asiento den parlamento e kiesdeler ta bira 2,642 voto.

Marchena a sigui splica cu ora repartí esaki ta nifica cu partido PPA a saca un asiento, partido

Futuro a saca dos asiento, partido MEP a saca seis asiento y partido AVP a saca seis asiento. El a indica cu mirando cu tin 21 asiento, mester reparti e seis asientonan cu a keda, cual ta restzetels.

Esaki a ser reparti como lo siguiente; partido AVP a haya e prome restzetel, partido MEP a haya e di dos restzetel, partido Futuro a haya e di tres restzetel, AVP a haya e di cuater, MEP a haya e di cinco restzetel y partido AVP a haya e ultimo asiento. Esey ta nifica cu Futuro a haya un restzetel, MEP a haya dos restzetels y AVP a haya tres restzetels.

E resultado oficial di eleccion parlamentario 2024 pa loke ta trata asientonan ta partido PPA cu un asiento, partido Futuro cu tres asiento, partido MEP cu ocho asiento y partido AVP cu nuebe asiento.

Marchena a informa tambe kico ta e bira e lijstkiesdeler, e total di voto di cada partido dividi door di e total asiento cu e partido a saca. E lijstkiesdeler ta yuda determina ken ta e candidatonan cu ta drenta parlamento.

Ley ta stipula cu e candidatonan cu ta drenta parlamento ta ser scogi segun e number cu nan tin riba lista. E candidatonan cu tin e numbernan mas halto riba lista ta esunnan cu ta drenta Parlamento di Aruba. Pero si e partido ta desea, a traves di un acuerdo, e partido mes por scoge, si nan ta desea di haci esaki, ken ta representa e partido den parlamento.

Den caso cu tin un candidato cu un number mas abou riba e lista, si e candidato aki su total di voto surpasa e lijstkiesdeler e tin e derecho riba un asiento den parlamento.

Marchena a informa ken ta e candidatonan pa cada partido cu lo drenta parlamento. Pa partido PPA, cu a saca un total di 3,538 voto y un asiento, Otmar Oduber ta e candidato scogi pa parlamento.

Pa partido Futuro, cu a saca total 7,351 voto y tres asiento, e lijstkiesdeler ta 2450.33. Candidatonan riba e lista aki cu ta ser scogi ta Gerlien Croes, Geoffrey Wever y Gino Goeloe. Pa partido MEP, cu a saca total 17,560 voto y a haya ocho asien-

to, e lijstkiesdeler ta bira 2195. E candidatonan cu ta ser scogi ta Evelyn Wever-Croes, Dangui Oduber, Xiomara Maduro, Endy Croes, Rocco Tjon, Hendrick Tevreden, Edgard Vrolijk y Shailiny Tromp-Lee

Partido AVP, cu a saca total 17,872 y haya nuebe asiento e lijstkiesdeler ta bira 1985.77. E candidatonan scogi ta Wendrick Cicilia, Mike de Meza, Arthur Dowers, Stephanie Sievinger, Mervin Wyatt-Ras, Jennifer Arends-Reyes, Clifford Heyliger, Sonaly Fernandez-Acosta y Mike Eman. Den e caso specifico aki, candidato Mike Eman ta number 29, pero su total di voto a surpasa e lijstkiesdeler y pues tin derecho riba un asiento den parlamento.

Den caso cu e algun di e candidatonan menciona, cu a haya asiento den parlamento, asumi responsabilidad como minister despues cu concretisa formacion di gobierno, e asientonan di parlamento cu tabata destina pa e candidatonan aki ta bay e ora pa e siguiente candidatonan riba e lista, segun e volgorde di e number di e candidato riba e lista manera cu ley ta stipula.